

KERATAN AKHBAR-AKHBAR TEMPATAN
TARIKH: 26 MAC 2017 (AHAD)

Bil	Tajuk	Akhbar
1.	MOSTI harap lebih ramai jurutera tempatan dilahirkan	BERNAMA
2.	Gempa bumi lemah landa Ranau	Utusan Online
3.	TNB, Jabatan Meteorologi meterai MoU tingkatkan pengurusan risiko	BERNAMA
4.	Gempa bumi sederhana landa Papua New Guinea	BERNAMA



MOSTI Harap Lebih Ramai Jurutera Tempatan Dilahirkan

MELAKA, 25 Mac (Bernama) -- **Kementerian Sains, Teknologi dan Inovasi (MOSTI)** berharap lebih ramai jurutera tempatan dapat dilahirkan bagi memenuhi keperluan guna tenaga kerja bidang tersebut pada masa hadapan.

Timbalan Menteri, Datuk Dr Abu Bakar Mohd Diah berkata di bawah program Mega sains 3.0, kementeriannya merancang profesion baharu dalam lima industri baharu dan jurutera merupakan profesion yang perlu difikirkan.

Beliau berkata sejajar dengan itu, MOSTI akan bertindak dengan lebih proaktif dalam melaksana pelbagai langkah untuk meningkatkan kesedaran masyarakat, selain menangani persepsi negatif mengenai sains yang dianggap sebagai bidang kritikal.

"Kita jangka lebih daripada 30 profesion baharu akan wujud menjelang 2050. Oleh itu kita perlu lebih ramai jurutera tempatan bagi memenuhi keperluan tersebut," katanya kepada Bernama di sini Sabtu.

Terdahulu, beliau menyampaikan syarahan eksklusif mengenai sains, kejuruteraan dan teknologi ke arah TN50 serta melancarkan laman web The Institution of Engineers, Malaysia (Melaka) di sebuah hotel di sini yang turut dihadiri oleh 30 jurutera dari seluruh Melaka.

"Bidang sains adalah sebahagian daripada kehidupan masyarakat zaman kini yang berteraskan kepada teknologi yang mana merupakan cabaran kepada generasi akan datang," katanya.

-- BERNAMA



Gempa bumi lemah landa Ranau

KUALA LUMPUR 26 Mac - Satu gempa bumi lemah berukuran 3.2 pada skala Richter berlaku di Ranau, Sabah pada 1.10 pagi ini.

Jabatan Meteorologi Malaysia dalam satu kenyataan berkata pusat gempa itu ialah 320 kilometer barat laut Tarakan, Indonesia dan 11 kilometer barat Sabah.

Gegaran dirasai di barat Sabah, kata kenyataan itu di sini hari ini. - BERNAMA



TNB, Jabatan Meteorologi Meterai MoU Tingkatkan Pengurusan Risiko

KUALA LUMPUR, 25 Mac (Bernama) -- Tenaga Nasional Bhd (TNB), dalam usaha meningkatkan pengurusan pendedahan asetnya kepada risiko bencana alam, akan bekerjasama dengan **Jabatan Meteorologi Malaysia** untuk menjalankan penyelidikan dan pembangunan dalam bidang meteorologi, klimatologi dan geofizik.

Dalam kenyataan hari ini, TNB berkata, kedua-dua pihak menandatangani memorandum persefahaman (MoU) pada sambutan Hari Meteorologi Dunia di Ipoh pada Khamis lepas.

TNB diwakili oleh Ketua Pegawai Korporatnya Datuk Wira Roslan Ab. Rahman dan Jabatan Meteorologi oleh Ketua Pengarahnya Datuk Che Gayah Ismail, katanya.

Katanya MoU itu akan menyaksikan kedua-dua pihak menjalankan latihan, seminar, bengkel dan persidangan secara bersama mengenai meteorologi, klimatologi dan geofizik.

Terdapat juga pertukaran pakar melalui penempatan atau latihan selain berkongsi kepakaran dari segi teknikal mengenai geofizik dan sebarang bentuk kerjasama lain dalam bidang sama yang dipersetujui bersama oleh kedua-dua pihak, katanya.

-- BERNAMA



Gempa Bumi Sederhana Landa Papua New Guinea

KUALA LUMPUR, 25 Mac (Bernama) -- Gempa bumi sederhana berukuran 5.4 pada skala Richter melanda Wilayah Timur New Guinea, Papua New Guinea pada pukul 5.07 petang tadi.

Jabatan Meteorologi Malaysia dalam satu kenyataan di sini hari ini berkata gempa itu berpusat di 44 kilometer barat daya Madang, Papua New Guinea dan 3,173km tenggara Semporna, Sabah.

Gempa itu tidak mendatangkan ancaman tsunami, tambah kenyataan tersebut.

-- BERNAMA